



Broj: 01/1-02-227/18
Breza, 07.02.2018. godine

Z A P I S N I K

Sa ČETRNAESTEREDOVNE SJEDNICE Općinskog vijeća održane dana 31.01.2018. godine sa početkom u 16,30 sati u prostorijama Općine Breza-Sala Općinskog vijeća.

Sjednicom je predsjedavao predsjedavajući Općinskog vijeća Jusić Vedad.

Po izvršenoj prozivci konstatovano je da sjednici Općinskog vijeća prisustvuje 19 vijećnika.

Na prozivci nisu bili prisutni vijećnici Beširević Selma i Ahmedspahić Mirza.

Osim vijećnika sjednici Općinskog vijeća su prisustvovali: Općinski načelnik Munib Zaimović, pomoćnici Općinskog načelnika: Meliha Beširević, Smajila Omerhodžić, Salih Hasanspahić, Herco Huso, općinski pravobranilac Dženana Telalović, članovi Odbora za provedbu Etičkog kodeksa, predstavnici i članovi političkih stranaka i predstavnici medija.

Predsjedavajući Općinskog vijeća Jusić Vedad upoznao je vijećnike da su održana dva sastanka predsjednika klubova parlamentarnih stranaka, te da se Zapisnici nalaze u materijalima, kao i mišljenja Komisije za Statut i propise.

Zatim se prešlo na razmatranje Zapisnika sa 13. redovne sjednice Općinskog vijeća Breza. Vijećnik Avdić Edin dao je primjedbu na stranu 6 zapisnika, da se upiše da je za reprezentaciju izdvojeno više sredstava nego za borbe.

Vijećnik Bajrić Fetah dao je primjedbu na strani 7. zatražio je da se u zapisnik unese da se od 330.000KM koliko je doznačeno Centru za socijalni rad, 240.000KM troši za plate uposlenika, a na korisnike centra 80.000KM. Predlaže da to bude obrnuto.

Vijećnik Arif Sirotanović također je uložio kritiku na zapisnik te smatra da je njegova diskusija djelimično unesena u zapisnik, te da nisu uneseni i prijedlozi koje je on dao na sjednici, te traži da se ubuduće diskusije unesu u cjelosti.

Radu vijeća se pridružio vijećnik Ahmedspahić Mirza.

Primjedbi na zapisnik više nije bilo, te je nakon provedenog postupka glasanja konstatovano da je isti sa datim primjedbama usvojen jednoglasno sa 20 glasova ZA.

Zatim se prešlo na komentare po odgovorima na vijećnička pitanja.

Vijećnik Bajrić Fetah istakao je da ni ovaj put nije dobio odgovore na ranije postavljena vijećnička pitanja koje je postavio općinskom načelniku i službi za finansije. Postavio je pitanje da li je Stručna služba Općinskog vijeća uputila urgenciju na dostavljanje vijećničkih pitanja. Traži da mu se za narednu sjednicu Općinskog vijeća pripremi u pismenoj formi odgovor, koliko i na kojim sjednicama je postavljao i tražio da mu se dostavi odgovor na vijećnička pitanja, kako bi pokrenuo dalju proceduru kod nadležnih organa za nedostavljanje odgovora na postavljena vijećnička pitanja. Smatra da kao vijećnik mora dobiti odgovor od nadležnih službi u roku od 30 dana.

Predsjedavajući Općinskog vijeća pojasnio je da od strane Kolegija Općinskog vijeća prema načelniku upućen Zaključak, kojim se traži dostavljanje traženih informacija i odgovora.

Vijećnik Avdić Edin tražio je dopunu odgovora koji se odnosi na provođenje javnih nabavki što je pomoćnik načelnika za privredu i odgovorio.

Vijećnik Arif Sirotanović djelimično je zadovoljan odgovorom na vijećničko pitanje koje se odnosi na udaljenost kladionica od vjerskih i drugih objekata te traži da se odgovor dopuni sa tačnom udaljenosti tih kladionica od pomenutih objekata.

Pomoćnik općinskog načelnika za privredu pojasnio je da se broj kao i udaljenost kladionica od vjerskih i školskih objekata nalazi u mapi na zvaničnoj web stranici Općine Breza.

Zatim se prešlo na postavljanje novih vijećničkih pitanja.

Vijećnik Sokić Dževahid uputio je inicijativu da nadležni organ općine Breza preduzme potrebne mjere te da se odredi dežurna apoteka koja bi radila 24h uključujući vikende i praznike.

Vijećnica Jekalović Amina postavila je pitanje:

„Ko je bio nadležan za dostavljanje podataka Monitoring tima ZDK čiji je zadatak da na osnovu tih izvještaja (izvještaja Općina ZDK) sačini izvještaj o realizaciji strategije kulturne politike ZDK za 2017. godinu.“

- Također je pokrenula inicijativu da se urade horizontalna i vertikalna signalizacija na području općine Breza kako na novoizgrađenim tako i na postojećim saobraćajnicama.

Vijećnik Bajrić Fetah postavio je pitanje koje se odnosi na isplatu poljoprivrednog podsticaja za 2017. godinu, visina poticaja i kome je isplaćen.

- Drugo pitanje odnosi se na rješavanje imovinsko-pravnih odnosa za lokaciju Centralnog šehidskog obilježja.

- Pokrenuo je inicijativu o pokretanju odgovornosti za neusvajanje Izvještaja o radu mjesnih zajednica u periodu od 2013.-2016.godine.

Radu vijeća se priključila vijećnica Beširević Selma u 17:15h.

Vijećnik Sirotanović Arif zatražio je odgovor koji se odnosi početak gradnje Centralnog šehidskog obilježja te na osnovu čega je gradnja započeta.

- Zatražio je odgovor na pitanje ko je vlasnik zemljišta oko pošte te ko je dužan da izvrši uređenje.

- Pokrenuo je vijećničku inicijativu o uspostavljanju saradnje sa vijećnicima susjednih Općina.

Vijećnik Kadrić Memsud postavio je pitanje:

- U kojoj fazi i da li će biti nastavljena izgradnja na platou bivše robne kuće,

- da se izvrši razgovor sa predstavnicima BM prometa te da li imaju namjeru graditi na zemljištu kod semafora.

Vijećnik Bašić Mirnes postavio je vijećničko pitanje:

- Da li su planirana sredstva u budžetu za prijem dva službenika u centru za socijalni rad Breza.

Vijećnik Avdić Edin iznio je konstataciju da je općinsko vijeće predstavničko tijelo izabrano od građana općine Breza da njih predstavlja i da samo njima odgovara. Kada su u pitanju općinski vijećnici, mišljenja je da ima dosta političke korupcije u ovom OV, te da razmišlja da iz protesta više ne postavlja vijećnička pitanja i inicijative. Vijećnici u svom radu treba da se rukovode slobodnom voljom i da predstavljaju volju građana, ali kada je vijećnik pod političkom korupcijom onda prestaje slobodna volja i interes građana i prelazi u lični interes.

Postavio je vijećničko pitanje koje se odnosi na besplatnu pravnu pomoć, da li je u Brezu zastupljena onoliko koliko je potrebno te da li ima potrebe za otvaranjem kancelarije.

Postavio je vijećničko pitanje koje se odnosi na kvalitet i cijenu vakcina protiv gripe na našem području.

Vijećnik Suljagić Mirzet postavio je vijećničko pitanje koje se odnosi na isplatu sredstava parlamentarnim grupama- vijećničkim klubovima.

Pokrenuo je vijećničku inicijativu koja se odnosi na sanaciju pružnog prelaza u Podžupči.

Nakon toga pristupilo se utvrđivanju dnevnog reda.

Predsjedavajući Općinskog vijeća predložio je dnevni red kao u sazivu sjednice.

Primjedbi na predloženi dnevni red nije bilo te je nakon provođenja postupka glasanja konstatovano daje jednoglasno sa 21 glas za usvojen sljedeći dnevni red.

D N E V N I R E D

1. Usmena informacija o radu Općinskog načelnika u periodu između dvije sjednice.
2. Razmatranje i usvajanje prijedloga Odluke o utvrđivanju prosječne građevinske cijene 1m² korisne stambene površine na području općine Breza.
3. Razmatranje i usvajanje Odluke o davanju prethodne saglasnosti na dodjelu koncesije za istraživanje i eksploataciju mineralnog resursa-uglja na području općine Breza.
4. Razmatranje i usvajanje prijedloga Odluke o dodjeli u zakup sportskog centra „Partizan“ Udruženju sportskom savezu općine Breza.
5. Razmatranje i usvajanje prijedloga Odluke o dodjeli u zakup sportskog centra „Partizan“ Udruženju „ZOOM“ Breza.
6. Razmatranje i usvajanje prijedloga Odluke o prenosu prava upravljanja i korištenja izgrađenog vodnog objekta za iskorištavanje voda za vodosnabdijevanje „Vodovod za naselje Trtorići i Opreč sa izvorišta Dadijevac“ na Javno preduzeće „Komunalno“ d.o.o. Breza.
7. Razmatranje i usvajanje prijedloga Programa rada Općinskog vijeća za 2018. godinu.
8. Razmatranje i usvajanje Zaključaka o davanju saglasnosti na Akcioni plan kapitalnih investicija za 2018. godinu.
9. Razmatranje i usvajanje prijedloga Zaključaka o pokretanju postupka , za dodjelu javnih priznanja općine Breza za 2018. godinu.
10. Razmatranje Nacrta Programa obavljanja komunalnih usluga zajedničke komunalne potrošnje u vremenu od 15.03.2018. do 15.03.2019. godine, i donošenje zaključka po istom.
11. Razrješenje i imenovanje na kraći period članova Upravnog odbora JU Dom zdravlja Breza.
12. Razmatranje i usvajanje Zaključka da se sačini sveobuhvatna Informacija o stanju sporta na području općine Breza.
13. Razmatranje i usvajanje Zaključka o uvođenju savremenih tehnologija u radu Općinskog vijeća Breza.

Ad.1

Usmena informacija o radu Općinskog načelnika u periodu između dvije sjednice

Općinski načelnik upoznaje vijeće da su u periodu između dvije sjednice vođene aktivnosti na:

- U saradnji sa švicarskom ambasadom utoku izrada Strategija razvoja općine Breza za period od 2018. do 2021 godine. Završetak projekta očekuje se u mjesecu aprilu tekuće godine.
- Sa predstavnicima RMU Breza obavljani razgovori o davanje saglasnosti na dodjelu koncesija za istraživanje u eksploataciju mineralnog resursa-uglja na području Općine Breza unutar granica eksploatacionog polja utvrđenim Prostornim planom. Obzirom da se radi o veoma složenoj tematici održani jeviše sastanaka sa stručnim ljudima iz ove oblasti u cilju donošenja najboljeg rješenja.
- U završnoj fazi je uvođenje ISO standard.
- Nastavlja se donošenje planskih dokumenata (Hrasno, Poljice i Kolonije)
- Završen je i projekat vodovoda Dadijevac- te se očekuje puštanje objekta u probni rad.
- Nastavljaju se projekti izgradnje vodovoda Bukovik, ucjevljenje potoka Jasike a vrše se i pregovori sa „Centotransom o prevozu putnika.
- U fazi je raspisivanje tendera za projekte: vodovoda Slivno, za izgradnju zgrade za Rome, nastavak rekonstrukcija puta 444, a vode se i aktivnosti na iznalaženju lokacije za autobusko

stajalište u naselju Podžupča. Biće nastavljen projekat izgradnje trotoara od naselja Podžupča prema Brezi.

Takođe su odobrena sredstva objekat filterskog postrojenja , kako bi se objekat predao na upravljanje JP „Komunalno“ d.o.o.Breza.

Kada je u pitanju projekat izgradnje kolektora za prečišćavanje otpadnih voda za tri općine u fazi je izrada glavnog projekta .

Predsjedavajući Općinskog vijeća upoznao je vijećnike da je izrada Strategije razvoja Općine Breza u završnoj fazi. Trenutno se radi na formiranju partnerske grupe koja će brojati oko 30 stručnih ljudi koji će nadzirati i kontrolisati provođenje Strategije razvoja u kojoj mogu učestvovati i općinski vijećnici.

Ad.2

Razmatranje i usvajanje prijedloga Odluke o utvrđivanju prosječne građevinske cijene 1m² korisne stambene površine na području općine Breza.

Pomoćnik općinskog načelnika Smajila Omerhodžić dala je pravni osnov za donošenje ove odluke koji je sadržan u člana 66. Zakona o građevinskom zemljištu FBiH koji glasi: „Kao osnovica za izračunavanje visine rente služi prosječna konačna građevinska cijena iz prethodne godine m² korisne stambene površine na području općine. Prosječnu konačnu građevinsku cijenu utvrđuje odlukom općinskog vijeća svake godine, a najkasnije do 31. marta tekuće godine.“

Bez učesnika u raspravi jednoglasno sa 21 glas ZA usvojena je Odluke o utvrđivanju prosječne građevinske cijene 1m² korisne stambene površine na području općine Breza.

Ad.3

Razmatranje i usvajanje Odluke o davanju prethodne saglasnosti na dodjelu koncesije za istraživanje i eksploataciju mineralnog resursa-uglja na području općine Breza.

Pomoćnik općinskog načelnika Salih Hasanspahić pojasnio je da se JP Elektroprivreda BiH sarajevo ZD RMU Breza obratilo zahtjevom nadležnom ministarstvu ZDK za dodjelu koncesije za eksploataciju uglja. Uz zahtjev je priložena Studija o ekonomskoj opravdanosti dodjele koncesije na eksploataciju uglja. Nadležno ministarstvo u postupku dodjele koncesije zatražilo je od Općine Breza donošenje Prethodne saglasnosti. U tom smislu Općinsko vijeće je na prijedlog općinske službe na prethodnoj sjednici utvrdilo Zaključak o provođenju javne rasprave u trajanju od 30 dana. Javna rasprava je provedena u skladu sa navedenim Zaključkom Općinskog vijeća i sačinjen je zapsinik koji je u prilogu. Obzirom da se radi o veoma složenoj tematici te da je u radu došlo do neslaganja u pogledu eksploatacionih polja i planske dokumentacije predlaže da se javna rasprava produži za još 30 dana kako bi se na siguran način ova pitanja usaglasila.

Vijećnik Avdić Edin predlaže da općinski načelnik predloži stručni tim koji će sa predstavnicima RMU Breza utvrditi eksploataciona polja na koja se daje prethodna saglasnost za istraživanje i eksploataciju mineralnog resursa uglja.

Predsjedavajući Općinskog vijeća predložio je sljedeći:

ZAKLJUČAK

I

DA SE produži javna rasprava po Odluci davanju prethodne saglasnosti na dodjelu koncesije za istraživanje i eksploataciju mineralnog resursa-uglja na području Općine Breza, za 30 dana.

II

Da Općinski načelnik imenuje pregovarački tim, ispred općinskog Organa koji će sa predstavnicima RMU Breza, utvrditi eksploataciona polja na koje se daje prethodna

saglasnost za istraživanje i eksploataciju mineralnog resursa-uglja na području Općine Breza.

III

Za realizaciju tačke I zaključka zaključka zadužuje se Služba za privredu, a za realizaciju tačke II zadužuje se Općinski načelnik.

Nakon provedenog postupka glasanja konstatovano je da je Zaključak usvojen jednoglasno sa 21 glas ZA , bez protiv i suzdržanih glasova.

Ad.4

Razmatranje i usvajanje prijedloga Odluke o dodjeli u zakup sportskog centra „Partizan“ Udruženju sportskom savezu općine Breza.

Pravni osnov kao i razloge za donošenje dala je pomoćnik općinskog načelnika Smajila Omerhodžić koja je istakla da se Sportski savez općine Breza, pisanim putem obratio se Službi za prostorno uređenje, zaštitu okoliša, geodetske i imovinsko-pravne poslove Općine Breza, zahtjevom za dodjelu prostorija u zgradi „Partizan“ u Brezi, u zakup, radi obavljanja sportskih djelatnosti.

Vijećnik Kadrić Memsud postavio je pitanje zašto i ostatak prostorija u zgradi Partizan nije dodjeljen Sportskom savezu na korištenje, na što je g-đa Omerhodžić pojasnila da su Sportskom savezu dodjeljene prostorije i objekti vezani za sportske aktivnost , a da ostali prostor nije potreban Sportskom savezu za obavljanje svojih aktivnosti.

Učesnika u raspravi više nije bilo te je predsjedavajući dao na glasanja Odluke o dodjeli u zakup sportskog centra „Partizan“ Udruženju sportskom savezu općine Breza, te je konstatovano da je ista usvojena sa 20 glasova ZA , bez protiv i suzdržanih glasova.(U trenutku glasanja u sali nije bio prisutan vijećnik Muratović Asim).

Ad.5

Razmatranje i usvajanje prijedloga Odluke o dodjeli u zakup sportskog centra „Partizan“ Udruženju „ZOOM“ Breza.

Pomoćnik općinskog načelnika Smajila Omerhodžić pojasnila je da Udruženje za pravedniji i solidarniji društveni ambijent „ZOOM“ Breza, pisanim putem obratilo Službi za prostorno uređenje, zaštitu okoliša, geodetske i imovinsko-pravne poslove Općine Breza, zahtjevom za dodjelu prostorijana korištenje, radi obavljanja djelatnosti udruženja, odnosno za provođenje aktivnosti na stvaranja političke neovisnosti i slobodoumnog djelovanja, u cilju pravednijeg i solidarnijeg društvenog ambijenta na području općine Breza, ali i cjelokupne teritorije BiH.

Obzirom na djelatnost Udruženja „ZOOM“ Breza i da im je za rad potreban određeni prostor, predlaže se Općinskom vijeću donošenje ove Odluke.

Vijećnik Sirotnović Arif zatražio je pojašnjenje o kakvom udruženju je riječ i ko je predsjednik udruženja.

G-đa Omerhodžić pojasnila je da je uslužbu stigao zahtjev od pomenutog udruženja te da trenutno nemože dati više podataka.

Predsjedavajući Općinskog vijeća predlaže da se za neku od narednih sjednica pripremi Informacija u broju udruženja na području općine Breza te licima koja vode ta udruženja i čime se bave.

Općinski načelnik dao je dopunu odgovora te je pojasnio da je udruženje registrovano te da je regularlo podnijelo zahtjev i da nema nikave smetnje da se prostorije dodjele.

U fazi izrade su i kriteriji za dodjelu sredstava te će se u narednom periodu sačiniti informacija o korištenju svih prostorija koje su općinsko vlasništvo te ko ih koristi.

Pomoćnik Općinskog načelnika Meliha Beširević pojasnila je da je Programom rada Općinskog vijeća za 2018. godinu predviđeno da registrovana udruženja na području Općine Breza podnesu Izvještaj o radu sa finansijskim izvještajem.

Učesnika u raspravi više nije bilo te je nakon glasanja konstatovano da je Odluka o dodjeli u zakup Sportskog centra „Partizan“ Udruženju „ZOOM“ Breza, usvojena sa 18 glasova ZA 2 vijećnika su suzdržana , 1 glas protiv.

Uslijedila je pauza od 18:10-18:30 h

Ad.6

Razmatranje i usvajanje prijedloga Odluke o prenosu prava upravljanja i korištenja izgrađenog vodnog objekta za iskorištavanje voda za vodosnabdijevanje „Vodovod za naselje Trtorići i Opreč sa izvorišta Dadijevac“ na Javno preduzeće „Komunalno“ d.o.o. Breza.

Pomoćnik općinskog načelnika Salih Hasanspahić dao je pravni osnov za donošenje predložene odluke te je istakao da je općina Breza, kao investitor, izgradila vodni objekat za iskorištavanje voda za vodosnabdijevanje „Vodovod za naselja Trtorići i Opreč sa izvorišta Dadijevac“. Objekat je izgrađen na osnovu odobrenja za građenje broj: 03/2-3-23-1346/12 od 12.12.2012, Rješenje o izmjeni Rješenja, broj:04/1-4-23-1287/17 od 22.09.2017. godine, a u skladu sa glavnim projektom koji je izveden od strane firme „IBIS“ d.o.o. Zavidovići. Ukupna vrijednost projekta je 238.809,08 KM (dvjestotridesetosamhiljadaosamstodevet i 08/100 konvertibilnih maraka). U skladu sa odredbama Zakona o prostornom uređenju i građenju Zedokantona izvršen je tehnički prijem vodnog objekta i u tom smislu od strane nadležne službe izdata upotrebna dozvola, broj: 04/1-4-23-1445/17 od 26.12.2017. godine. Obzirom da se radi o vodnom objektu koji je u vlasništvu Općine, Ovom Odlukom se prenosi pravo upravljanja i korištenja na JP „Komunalno“ d.o.o. Breza, pa se predlaže Općinskom vijeću Breza da istu usvoji u predloženom tekstu.

Vijećnica Jekalović Amina istakla je da je u razlozima za donošenje napisano da je vrijednost objekta 238.809.00 KM. U razgovoru sa mještanima doznala je da su građani ovog naseljenog mjesta učestvovali u finansiranju , te o kom iznosu se radi,

Pomoćnik općinskog načelnika Salih Hasanspahić pojasnio je da je da je MZ finansirala dobijanje projektne dokumentacije kao i potrebne saglasnosti.

Učesnika u raspravi više nije bilo te je nakonprovedenog postupka glasanja konstatovano da jeOdluka o prenosu prava upravljanja i korištenja izgrađenog vodnog objekta za iskorištavanje voda za vodosnabdijevanje „Vodovod za naselje Trtorići i Opreč sa izvorišta Dadijevac“ na Javno preduzeće „Komunalno“ d.o.o. Breza usvojena jednoglasno sa 21 glas ZA, bez protiv i suzdržanih glasova.

Ad.7

Razmatranje i usvajanje prijedloga Programa rada Općinskog vijeća za 2018. godinu.

Sekretar Općinskog vijeća Safet Zahirović istakao je da je na osnovu provedene procedure došli do konačnog prijedloga Programa rada Općinskog vijeća za 2018. godinu. Također je istakao da je na zakazanu Javnu raspravu došlo samo 3 vijećnika , te da isto tako nije bilo pismenih prijedloga i sugestija.Smatra da su se vijećnici trebali više uključiti u donošenje ovog Programa obzirom da je akt Općinskog vijeća.

Vijećnik Avdić Edin predlaže da se ispravi na strani 13. tačka 36. da se umjesto„rješavanja lokacije deponije otpada na području Općine Breza sa akcionim planom saniranja divljih deponija na području Općine Breza i zaštite životne sredine“ upiše„provođenje plana upravljanja otpadom na području općine Breza sa akcionim planom saniranja divljih deponija na području općine Breza i zaštite životne sredine“.

Vijećnik Bajrić Fetah predlaže da se Izvještaj o radu Općinskog načelnika i jedinstvenog općinskog organa uprave planira kao pojedinačni izvještaji službe o kojim će se vijeće pojedinačno izjašnjavati.

Dato je pojašnjenje daje općinski načelnik dužan Općinskom vijeću podnijeti jednom godišnje Izvještaj o radu. Izvještaji Sanitarno komunalnog i građevinskog inspektora Općinsko

vijeće razmatra mimo Izvještaja općinskog načelnika, obzirom da se radi o službenicima sa posebnim ovlaštenjima koji su samostalni u svom radu.

Nakon datih pojašnjenja Program rada Općinskog vijeća Breza za 2018. godinu usvojen je jednoglasno sa 21 glas ZA, bez protiv i suzdržanih glasova.

Ad.8

Razmatranje i usvajanje Zaključaka o davanju saglasnosti na Akcioni plan kapitalnih investicija za 2018. godinu.

Pomoćnik općinskog načelnika Salih Hasaspahić pojasnio je da Akcioni plan kapitalnih investicija za 2018. godinu, finansira iz budžeta općine Breza za 2018. godinu, sredstava obezbijeđenih iz drugih izvora-Javni pozivi viših nivoa vlasti i međunarodnih donacija u iznosu od 2.707.811,87KM. Akcioni plan je planiran na osnovu provedenog Javnog oglasa i pristiglih aplikacija, kao i snimljenih potreba građana Općine Breza te određenih prioriteta. Predlaže Općinskog vijeću da da saglasnost na ovaj Akcioni plan. Prilikom predlaganja Akcionog plana općinski načelnik je uzeo u obzir započete a nezavršene projekte, stanje na terenu i nepostojanje projektne dokumentacije te ostale potrebe za poboljšanje uslova života građana općine Breza.

Predsjedavajući Općinskog vijeća upoznao je vijećnike da je od predsjednika MZ-e Župča stiglo pismo kojim se izražava nezadovoljstvo stanovnika ove mjesne zajednice zbog toga što nisu uključeni u ovaj Akcioni plan ni sa jednom markom, osim što je od vlade ZDK doznačen iznos od 166.000 KM na ime utopljanje škole u Župči. Istakli su da je u ovoj MZ potrebno krenuti u realizaciju više projekata kao što su rekonstrukcija puta, vodovoda, završetak društvenog doma itd.

Vijećnik Bajrić Fetah smatra da je ovo veliki iskorak u odnosu na protekli periodi da su predviđena sredstva nedovoljna i da bi trebala biti veća. Također smatra da u ovom slučaju nisu pravilno utvrđeni prioriteti i redosljed realizacije Akcionog plana, naprimjer prvo se radi kanalizacija u Bukovikuk koja je u samom naselju završena i ucjevljena, te se izgradnja nastavlja dalje kroz livadeoko 2 kilometra, i koja dalje ide kroz naselje Bate otvorenim tokom. Smatra da bi trebalo krenuti obrnuto od naselja prema visinskim dijelovima kako bi se eliminisale da otpadne vode prolaze kroz naseljena mjesta. Treba uraditi korekciju. Isto tako smatra da bi prvo trebalo uraditi rasvjetu u mjestima gdje je nema nikako, pa tek onda ići u rekonstrukciju postojeće rasvjete. Takođe je nelogično izgradnja i završetak šehidskih obilježja u naselju Mahala i Slivno, dok glavno Centralno šehidsko obilježje nije predviđeno ništa po čemu se vidi naš odnos prema tim kategorijama.

Vijećnik Avdić Edin je istakao da se ovdje ne vidi šta je tokratkoročna, srednjoročna i dugoročna strategija i uglavnom se radi o investicionim projektima. Smatra da treba ulagati u kapitalne projekte kroz čiju realizaciju će stvoriti novi kapital i stvoriti pretpostavke za nova zapošljavanja. Treba utvrditi koji su to resursi Breze na koje možemo računati i ostvariti razvoj općine i zapošljavanje.

Predsjedavajući Općinskog vijeća pojasnio je da je u toku donošenje Strategije razvoja Općine Breza koja će jasno definisati obuhvatiti projekte i pitanja o kojima je govorio vijećnik Avdić Edin.

Vijećnik Buljetović Ćamil zatražio je od predsjedavajućeg Općinskog vijeća da upozna vijećnike o sadržaju pisma koje su uputili mještani MZ Župča, i da se sredstva općine Breza i sredstva drugih nivoa vlasti razdvoje.

Pomoćnik Općinskog načelnika Salih Hasanspahić je pojasnio da je općina Breza uputila zahtjev i potpisala Ugovor o implementaciji projekat utopljanja OŠ Safet beg Bašagić podružne škole u naselju Župča i sredstva su doznačena od nadležnog ministarstva ZDK. Također je istakao da je na području općine Breza završeno asfaltiranje puta, tako da MZ Župča trenutno nema makadamskog puta. Izvršeno je ucjevljivanje dijela kanalizacije. Kada je u pitanju rekonstrukcija vodovoda Mahmutović rijeka istakao je da je to javni vodovod i kad

se steknu uslovi započeti će rekonstrukcija pomenutog vodovoda. Također je pojasnio da je MZ Župča aplicirala za završetak i rješavanje statusa društvenog doma te da je trenutno u postupku rješavanje projektne dokumentacije.

Predsjedavajući općinskog vijeća pročitao je pismo upućeno od strane građana MZ Župča.

Općinski načelnik pojasnio je da je od strane općine Breza formirana komisija koja je uputila javni poziv svim zainteresovanim da mogu prijaviti projekte, te je komisija donijela konačnu listu.

Vijećnik Kadrić Memsud pohvalio je donošenje ovog Akcionog plana te je istakao da se pristupi izradi projektne dokumentacija za rekonstrukciju sekundarne mreže u Brezi kako bi se moglo započeti sa rekonstrukcijom iste. Isto tako treba donijeti i projektnu dokumentaciju za rekonstrukciju vodovoda Mahmutović Rijeka.

Predsjedavajući pojasnio je da je bilo 70 prijedloga projekata, te da će na osnovu istih donijet prijedlog Akcionog plana.

Vijećnik Salčinović Fikret pohvalio je načelnika i saradnike što su donijeli Akcioni plan koji je sastavljen od projekata koji su predložili građani Breze i što su potekli iz baze. Za pohvalu je gest našeg sugrađanina koj će finasirati ojačanje mosta u ul. 6 april, te predlaže dodjelu šestoaprilске nagrade investitoru projekta. Također apeluje na sve one koji mogu finansijski pomoći u realizaciji različitih projekata da to učine obzirom da sredstva iz budžeta općine Breza nisu dovoljna za sve potrebe građana općine Breza.

Vijećnik Sirotanović Arif pozdravlja realizaciju projekata vodosnabdijevanja rubnih dijelova općine Breza, a također predlaže da se naredne godine za rekonstrukciju vodovoda M.rijeka planiraju sredstva u Budžetu u iznosu od 500.000 KM.

Općinski načelnik pojasnio je da je ove godine u budžetu planiran iznos od 200.000 KM za izradu projektne dokumentacije za projekte predviđene Akcionim planom. Također je istakao da će u Brezi biti izvršena rekonstrukcija sekundarne vodovodne mreže. Priprema se projektna dokumentacija kako bi se moglo aplicirati za sredstva evropskih fondova.

Učesnika u raspravi više nije bilo te je nakon provedenog postupka glasanja konstatovano da je Zaključak o davanju saglasnosti na Akcioni plan kapitalnih investicija za 2018. godinu usvojen sa 19 glasova ZA, i 2 suzdržana glasa

Ad.9

Razmatranje i usvajanje prijedloga Zaključaka o pokretanju postupka, za dodjelu javnih priznanja općine Breza za 2018. godinu.

Bez učesnika u raspravi usvojen je Zaključak o pokretanju postupka, za dodjelu javnih priznanja općine Breza za 2018. godinu jednoglasno sa 21 glas ZA, bez protiv i suzdržanih glasova.

Ad.10

Razmatranje Nacrta Programa obavljanja komunalnih usluga zajedničke komunalne potrošnje u vremenu od 15.03.2018. do 15.03.2019. godine, i donošenje zaključka po istom.

Pomoćnik općinskog načelnika Smajila Omerhodžić istakla je da je služba pripremila Nacrt Programa obavljanja komunalnih usluga zajedničke komunalne potrošnje u vremenu od 15.03.2018. do 15.03.2019. godine, te da će se održati javna rasprava na kojoj pravo učešća imaju svi vijećnici i zainteresovani te ih poziva da uzmu učešće u javnoj raspravi kako bi se donio što kvalitetniji program.

Vijećnik Kadrić Memsud postavio je pitanje sa koliko postotaka je izvršen prethodni program. Istakao je da prošli Program nije realizovan kako je planirano, te da se nastojda se ovogodišnji Program izvrši kako je planiran.

Vijećnik Sirotanović Arif je dao komentar da programom nije obuhvaćeno čišćenje snijega, nakon čega je g-đa Omerhodžić pojasnila da ovaj program ne tretira zimsko održavanje puteva

Učesnika u raspravi više nije bilo te je predsjedavajući općinskog vijeća predložio sljedeći.

Z A K L J U Č A K

I

UTVRĐUJE SE Nacrt Programa obavljanja komunalnih usluga zajedničke komunalne potrošnje u vremenu 15.03.2018. do 15.03.2019.godine.

Po utvrđenom Nacrtu provesti javnu raspravu u okviru vijećnika Općinskog vijeća, predstavnika mjesnih zajednica, predstavnika privrednih subjekata, predstavnika javnih preduzeća i drugih korisnika.

II

Javnu raspravu sprovesti u periodu od 01.02.2018. do 20.02.2018.godine.

III

Za realizaciju zaključka zadužuje se Služba za prostorno uređenje, zaštitu okolice, geodetske i imovinsko-pravne poslove.

Nakon provedenog postupka glasanja konstaovano je da je Zaključak usvojen jednoglasno sa 21 glas ZA , bez protiv i suzdržanih glasova.

Ad 11.

Razrješenje i imenovanje na kraći period članova Upravnog odbora JU Dom zdravlja Breza.

Predsjedavajući Općinskog vijeća upoznao je vijećnike da je dana 09.01.2018. godine održan Kolegij Općinskog vijeća gdje je razmatrana Informacija o razrješenju i imenovanju vršioca dužnosti JU Dom zdravlja Breza shodno Zaključku Općinskog vijeća od 27.12.2017.

Nadležnost Općinskog vijeća je da izvrši razrješenje i imenovanje na prijedlog ovlaštenog predlagača tj općinskog načelnika Vijećnici su zaprimili prijedlog rješenja o razrješenju dva člana U.O. Doma zdravlja Breza kao i prijedlog rješenja za imenovanje članova UO na kraći vremenski period JU Dom zdravlja Breza.

Općinski načelnik istakao je da se prilikom razrješenja i imenovanja članova UO biti ispoštovana zakonska procedura i Zakon o zdravstvenoj zaštiti FBiH, te da nema namjeru uzimati bilo čiju nadležnost kod imenovanja, ni u kom slučaju neće dovesti ovu ustanovu u težak položaj.

U ime kluba vijećnika SDA vijećnik Muratović Asim istakao je da ovaj klub neće učestvovati i neće podržati imenovanje novih članova upravnog odbora iz razloga što je u postupku imenovanja prekršena zakonska procedura kod trenutno imenovanih članova UO. Također je istakao da i sam postupak imenovanja v.d. nije u skladu sa propisanom procedurom. Tvrdi da niti jednom riječju niti jednim postupkom klub vijećnika SDA kao i OO SDA Breza nije doprinijela ovakvoj situaciji i ovakvom stanju u JU Dom zdravlja Breza. Iznio je stav kluba OO SDA Breza da ne podržava kadrovske promjene u Domu zdravlja Breza na ovakav način i bez da se ispita odgovornost onih koji su narušili stabilnost rada ove ustanove.

Vijećnik Avdić Edin istakao je da je Općinsko vijeće osnivač JU Dom zdravlja Breza, te da ni u kom slučaju ne smije dovesti ovu ustanovu u težak položaj. Moramo biti veoma oprezni obzirom da se za nezakonita imenovanja može izreći i kazna zatvora. Problemi u JU Doma zdravlja Breza počeli su dolaskom nove garniture vlasti, krajem 2016.godine kada se aktuelna vlast nije dobro organizovala. Istakao je da je 18.07.2017.godine općinski pravobranilac na postavljeno vijećničko pitanje ko sačinjava UO od tri člana i da li je ispoštovana zakonska procedura kod imenovanja članova UO kako je zakonom propisano,

odgovorio da je prema odredbama člana 64 Zakona o zdravstvenoj zaštiti SI novine FBiH 46/10, da upravni odbor JU Dom zdravlja Breza, kao zdravstvene ustanove u vlasništvu općine imenuje i razrješava Općinsko vijeće na prijedlog Općinskog načelnika, kao i bliže kriterije za imenovanje. Upravni odbor sastoji se od 3 člana i to po jedan, predstavnik osnivača, stručnih radnika i predstavnik kantonalnog ministarstva zdravlja. Kod imenovanja članova upravnog odbora treba poštovati proceduru propisanu Zakonom o ministarskim, vladinim i drugim imenovanjima. U svom daljnjem izlaganju je tražio odgovor koja dva člana Upravnog odbora su imenovana ispred Ministarstva zdravstva a koji je ispred osnivača. Također je istakao da je imenovani UO nezakonit iz razloga što nemamamo predstavnika Ministarstva zdravstva. Predlaže da sekoalicioni partneri prilikom imenovanja usaglasе obzirom da bi razriješeni članovi upravnog odbora mogli pokrenuti sudski proces.

Predsjedavajući Općinskog vijeća istakao je da pokušamo naći zajedničko rješenje obzirom da nesmijemo dovesti u pitanje rad Doma zdravlja Breza.

Općinski načelnik predlaže da se odmah raspiše konkurs za članove upravnog odbora kako nalaže zakon.

Predsjedavajući Općinskog vijeća predlaže da se donese zaključak kojim se obavezuje općinski načelnik da odmah raspiše konkurs za članove UO Doma zdravlja Breza.

Vijećnik Avdić Edin postavlja pitanje odgovornosti za dosadašnje propuste kod imenovanja članova upravnog odbora.

Predsjedavajući Općinskog vijeća pojasnio je da Općinsko vijeće nije nadležno da pokreće pitanje odgovornosti i za to postoje nadležni organi.

Općinski pravobranilac Dženana Telalović istakla je da je nadležnost općinskog pravobranilaštva određena kantonalnim Zakonom o pravobranilaštvu, te da pravobranilaštvo nema ovlaštenja o poduzimanju radnji koje navodi vijećnik Avdić Edin. Odgovor koji je dala vijećniku Avdić Einu nije obavezujuće i isti je dala obzirom da je bila predsjednik komisije za izbor članova upravnog odbora, te je zajedno sa članovima komisije izvršila intervju predloženih kandidata te sačinili rang listu, te dostavila općinskom načelniku na dalju proceduru. Općinski načelnik je Općinskom vijeću predložio kandidate za upravni odbor koje je vijeće usvojilo, te u svakom slučaju ta rješenja su zakonita i nisu stavljena van snage.

Vijećnik Avdić Edin i dalje smatra da općinski pravobranilac ima preventivno djelovanje u zaštiti državne imovine, i ako JU Dom zdravlja Breze ne funkcioniše ona mora da djeluje. Upravni odbor je nezakonit zato što ministarstvo nije odredilo svog predstavnika a neznamo da li je zahtjev upućen u ministarstvo. Općinsko vijeće je sada u dilemi u pogledu legitimnosti UO.

Općinski pravobranilac Dženana Telalović istakla je da pravobranilaštvo nije nadležno za rješavanje ove problematike, djelovala je samo kao predsjednik komisije koju je imenovao Općinski načelnik i komisija nije bila nadležna da imenuje članove upravnog odbora obzirom da je to nadležnost općinskog načelnika.

Predsjedavajući je takođe pojasnio da je Općinski pravobranilac u svojstvu člana komisije za provođenje konkursne procedure za imenovanje članova UO Doma zdravlja Breza dala odgovor i nije nadležna za dalje provođenje procedure i da je to nadležnost općinskog načelnika da provede dalju proceduru. Općinsko vijeće nije dobilo povratnu informaciju koji član upravnog odbora su ispred osnivača, zaposlenih i ministarstva.

Vijećnik Kadrić Memsud istakao je da se u sve uvukla politika. Mišljenja je da Sanela Redžić nije dobila mandat ispred ministarstva, a da je Muratović Kenan ispred SDA. Nije mu poznato kako procedura dalje teče i ko je nadležan, da li je to općinski načelnik. Ministar zdravstva izjavio je da on nije dao saglasnost za člana UO ispred ministarstva, zato što nije raspisao konkurs. Ako se raspiše konkurs za direktora Doma zdravlja, može se desiti da se javi neko sa druge općine i o tome moramo voditi računa. Trebamo dati mandat privremenom UO da raspiše konkurs za konačno imenovanje upravnog odbora, a da nema mandat da raspisuje konkurs za direktora i prijemnovih uposlenika. U međuvremenu se nada da će neko od uposlenika Doma zdravlja Breza ispuniti uslove za direktora JU dom zdravlja Breza.

Predsjedavajući Općinskog vijeća podržava prijedlog vijećnika Kadrić Memsuda da vijeće donese zaključak kojim će privremenom upravni odbor dati mandat da raspiše konkurs za konačno imenovanje upravni odbor Doma zdravlja Breza.

Također je istakao da, kada se kaže da je politika umiješala svoje prsteističe da smo svi mi došli ispred političkih subjekata, te da je politika plemenita vještina, da ne sječemo granu na kojoj sjedimo nije kriva politika nego ljudi i treba ih reći imenom i prezimenom.

Općinski načelnik istakao je da problema oko imenovanja upravnih odbora JU nije bilo samo u Brezi i Visokom nego i u drugim općinama. U zakonu o imenovanjima nigdje se ne spominje sindikat nego se spominje općinski načelnik i Općinsko vijeće i saglasnost ministarstva.

Vijećnik Bajrić Fetah istakao je da je šteta već napravljena i srušen je ugled općinskog načelnika i Općinskog vijeća. Sam načelnik je rekao da on nije poštovao proceduru prilikom izbora. Upitan je i član upravnog odbora ispred uposlenika. Od preostala dva člana upravnog odbora nezna se ko koga predstavlja i ko je legitiman i da ministar nije dao saglasnost ni jednom od članova upravnog odbora. Mi sada smjenjujemo nekoga ko je možda legalan jer se član upravnog odbora Sanela Redžić na zapisniku potpisala kao zamjenik predsjednika upravnog odbora. Ima niz nelogičnosti i sve više nailazimo na probleme jer nismo iskreni jedni prema drugima i prema sebi. Trebamo provesti proceduru i Općinskom vijeću dati više informacija kako bi se moglo očitovati.

Općinski načelnik smatra da mi nemožemo ograničavati nadležnosti privremenog upravnog odbora, da ne može raspisati konkurs za direktora ustanove obzirom da to može uraditi vršilac dužnosti direktora doma zdravlja Breza.

Bajrić Fetah istakao je da je sporan način na koji je došao vršilac dužnosti direktora Doma zdravlja Breza.

Vijećnik Buljetović Ćamil smatra da je imenovanje stvar vladajuće koalicije i da nije bilo produženja mandata VD direktoru Doma zdravlja nebi ni znali da članovi UO nisu legalni. Trebalo je dati obrazloženje zašto su krivi dosadašnji članovi upravnog odbora i zašto se smjenjuju. Treba imati u vidu da mogupokrenuti sudski postupak protiv općine i Doma zdravlja. Zbog nefunkcionisanja vladajuće koalicije ispaštacijska zajednica. Ovakvim imenovanjima i zapošljavanjem zavijamo ovu općinu u crno.

Predsjedavajući još jednom potencira da privremenom upravnom odboru ne dajemo mandat da može raspisati konkurs za direktora ustanove kao i da može vršiti prijem novih radnika u Domu zdravlja Breza.

Vijećnik Sirotanović Arif istakao je da V.D. izabran sa mandatom da radi po zakonu i da ima pravo da radi da bi se problem riješio kao i da raspiše javni konkurs.

Nakon rasprave predsjedavajući Općinskog vijeća dao je na glasanje prijedlog Rješenja o *razrješenju članova Upravnog odbora JU Dom zdravlja Breza* Muratović Kenan i Sanele Redžić.

Nakon provedenog postupka glasanja konstatovano je da je rješenje usvojeno sa 14 glasova ZA i 7 suzdržanih glasova.

Nakon toga se pristupilo usvajanju rješenja o imenovanju na kraći period članova Upravnog odbora JU Dom zdravlja Breza na kraći period i to:

1. Dr. Midhat Beširević, predsjednik

2. Dr. Fatima Balta, član

3. Meliha Beširević, član

Nakon provedenog postupka glasaja konstatovano je da je rješenje usvojeno sa 12 glasova ZA, 6 suzdržanih glasova i 1 glasom protiv (zbog sukoba interesa 2 vijećnika su bila izuzeta od glasanja).

Ad 12.

Razmatranje i usvajanje Zaključka da se sačini sveobuhvatna Informacija o stanju sporta na području općine Breza.

Predsjedavajući Općinskog vijeća istakao je da je na sastanku kolegija Općinskog vijeća od 23.01.2018. godine razmatrana inicijativa vijećnika Buljetović Ćamila, te je

dogovoreno da se predloži zaključak da se ova tačka uvrsti u dnevni red sjednice općinskog vijeća, kako bi se prevazišlo postojeće stanje u sportu na području općine Breza. Predlaže se da nadležna općinska služba pripremi potreban materijal kako bi se donijelo što kvalitetnije rješenje. Predlaže da se vijeću obrati i podnosilac inicijative vijećnik Buljetović Ćamil.

Vijećnik Buljetović Ćamil kao podnosilac inicijative istakao je da smo mi svi svjesni u kakvom je stanju sport na području općine Breza, imajući u vidu činjenicu da je u proteklom periodu na području općine Breza bio registrovan veliki broj sportista i sportskih klubova koji su se borili u svim kategorijama. Danas je stanje veoma teško i mi kao vijećnici zajedno sa načelnikom trebamo poduzeti mjere da se to stanje popravi. Dosadašnji pokušaji su veoma slabi obzirom da je u 2017. godini za sport predviđen iznos od 117.000 KM. U izvještaju izvršenja Budžeta za 9 mjeseci 2017. godine vidi se da je za sport potrošeno samo 55.000 KM što je katastrofalno, i sa tim iznosom sport nemože funkcionisati. Građani Breze očekuju da taj iznos bude veći i od 140.000 KM obzirom da građani plaćaju sve obaveze i pune državne budžete i od svega toga na godišnjem nivou dobiju 80 hiljada za sport. To je glavni problem. Svi klubovi i objekti su u teškom stanju i problem je u našem odnosu prema stečenim vrijednostima koje imamo. Moramo riješiti taj problem. Na stanje utiču i međuljudski odnosi. Predlaže održavanje tematske sjednice na koju će biti pozvani predstavnici sportskih klubova, i svi oni koji bi mogli pomoći u rješavanju problema u sportu.

Predsjedavajući Općinskog vijeća pojasnio je da je Kolegij općinskog vijeća predložio zaključak kojim se ova tačka stavlja na dnevni red sjednice općinskog vijeća, a na Kolegiju općinskog vijeća će se utvrditi kako dalje djelovati i kako pripremiti tačku dnevnog reda bilo redovnu bilo tematsku sjednicu, i dati realno vrijeme predlagateljima da pripreme ovu tačku dnevnog reda.

Vijećnik Sirotanović Arif slaže se da je nastala velika kriza u sportu iako je Breza bila rasadnik velikih sportista. Predlaže formiranje radne grupe koja će predložiti mjere za prevazilaženje stanja na koji način će se riješiti problemi. Uključiti i sportske radnike i građane kako bi riješili problem. Iznijeti pred vijeće prijedlog. Treba oživjeti sport kako bi mlade ukonili sa ulice i spasili od današnjih poroka. Kroz taj program organizovati donatorske večeri i druge aktivnosti kako bi popravili finansijsku situaciju. Najveći problem je FK Rudar koji je u ovom trenutku pred zatvaranjem te ne treba dozvoliti da se ugasi obzirom da ubrzo slavi stogodišnjicu postojanja. Ne treba zapostavljati ni druge sportove. Formirati radno tijelo i sačiniti Program mjera.

Vijećnik Suljagić Mirzet pojasnio je da su sportski klubovi dužni do 28 februara izraditi završne račune, kako bi u mjesecu martu razmatrani na skupštinama klubova.

Vijećnik Bajrić Fetah istakao je da ga iznenađuje prijedlog bivših člana komisije koja u proteklom periodu nije uradila ništa na poboljšanju stanja u sportu. Istakao je da smo mi već donijeli Budžet za 2018 godinu i moramo se uklopiti u predloženi iznos.

Nakon rasprave predsjedavajući Općinskog vijeća predložio je sljedeći

Z A K L J U Č A K

I

DA SE sačini sveobuhvatna Informacija o stanju sporta na području općine Breza te da se predlože konkretne mjere u cilju prevazilaženje postojećeg stanja u segmentu sporta.

II

Na sjednicu Općinskog vijeća pozvati predstavnike sportskih klubova.

III

Za realizaciju zaključka zadužuje se Služba za finansije, inspeksijske poslove i opću upravu kao i predstavnici sportskih klubova.

Nakon provedenog postupka glasanja konstatovano je da je zaključak usvojen jednoglasno sa 19 glasova ZA , bez protiv i suzdržanih glasova (U trenutku glasanja usali nisu bili prisutni vijećnici Babović Anes i Bublušić Nejra.)

Ad 13.

Razmatranje i usvajanje Zaključka o uvođenju savremenih tehnologija u radu Općinskog vijeća Breza.

Predsjedavajući Općinskog vijeća istakao je da je također na sastanku kolegija 23.01.2018. godine dogovoreno da se povodom inicijative o uvođenju savremenih tehnologija elektronske komunikacije sa vijećnicima u Općinskom vijeću Breza predloži zaključak da se ista uvrsti u dnevni red sjednice Općinskog vijeća Breza. Istakao je da je provedena anketa sa vijećnicima te da je 16 vijećnika dali pozitivno mišljenje o uvođenju savremenih tehnologija.

Učesnika u raspravi više nije bilo te je nakon glasanja jednoglasno sa 21 glas ZA , bez protiv i suzdržanih glasova usvojen sljedeći:

Z A K L J U Č A K

I

DA SE pristupi uvođenju savremene tehnologije u dostavljanju materijala za sjednice Općinskog vijeća elektronskim putem, kao i ostala korespondencija sa vijećnicima Općinskog vijeća.

II

Za realizaciju zaključka zadužuje se Općinski načelnik, služba za finansije, inspeksijske poslove i opću upravu, predsjedavajući Općinskog vijeća i Stručna služba Općinskog vijeća .

Ovim je iscrpljen dnevni red četrnaeste redovne sjednice Općinskog vijeća Breza, koja je sa radom završila u 21.00 sat.

Sastavni dio ovog zapisnika čini i tonski zapis sjednice.

ZAPISNIK SAČINILA

Zakira Smailbegović
Jusić Vedad

Općinskog vijeća

PREDSJEDAVAJUĆI